

全粵詩卷五九九

區懷年

區懷年，字叔永。高明人。大相仲子。明熹宗天啟元年（一六二一）貢生，任太學考通判。明思宗崇禎九年（一六三六）人都候選，以內艱回籍，後授翰林院孔目。歸臥雲石，學赤松遊，日以廢和撰述爲事。著有玄超堂藏稿、擊筑吟諸集。清光緒高明縣志卷一三有傳。

區懷年詩，以中山圖書館藏清康熙年間刻本玄超堂藏稿為底本。

區懷年一

述先十章 並序

世廟辛亥間，先祖中憲起家邑宰，勘定島夷，著績東甌，詳於越乘。尋爲忌者所抑，僅以一郡量移，偉伐未酬，天人交憫。爰迨神宗己丑，而先考始雋禮闈，受庶常吉士，優擢史局，記注起居，復以經術爲儲皇友，勸百諷一，三禮告成。既而讒喙鷗張，東山考卜，忘情軒組，樂志典墳，行同謝傳之高，心符展季之達，典型雖遠，直道在人，梓里棠陰，疊申俎豆。小子既承嘉庇，懼隕前徽，追慕不遑，憬然敘述。

隆隆嘉運，碩彥是膺。德沐溫粹，言責休明。撓之不屈，溷之逾清。懿型姤節，邦國之楨。

伊予肇宗，鬼臾斯衍。匡翼有熊，令聞不殄。厥祚悠長，逮於中憲。受牧東甌，崇勳懋展。

肅後方升，島夷搆難。屠民戕吏，井邑既殫。賓資良牧，振旅桓桓。挫彼狂狡，越以乂安。倭奴之

犯溫台也，泰順當其孔道，人情洶洶。先王父櫻城死守，殲厥賊徒以千百計，更命青野，絕其糧糧，賊夜遁去。鄰

邑之瀕危殆者，多藉保全。

鳥盡弓藏，昔賢所懾。樂毅強燕，代於騎劫。哀鉞不佞，奸回肆謀。遙遙副車，亶墮駿業。竊考邦

政及諸簡書，王父戰功，合膺世爵。奧援不假，前績遽湮，循例一遷，課考成耳。既沒而公論始彰，乃得追贈大廷

尉。隆勳薄賞，君子惜之。

天錫純嘏，赫濯以昌。篤生哲考，維珩維璜。丕承先烈，微直肯堂。躋於清廟，黼黻用光。

粵在定陵，份份文質。孰佐論思，既軌既物。豹尾宣麻，螭頭載筆。夙夜惟寅，昭其罔佚。

珠輝玉燦，穆穆其容。爰承簡命，作友儲宮。陳詩繹典，納諸謙沖。乃贊三禮，百辟景從。三禮，

謂光廟受冊及冠、婚諸大典也。光廟初在潛邸，不異諸藩。一時請儲貳者，疏滿公車，久未得報。忽承中旨，克踐

青宮，天倫用彰，國本斯固，要非羣情所能測也。先考備員儲幄，祇事桐圭，考古陳詩，贊襄厥美，微言納牖，蓋

得勸百諷一之旨云。

直道寡援，孤行速謗。讒人訛訛，清時弗諒。休養天間，宸衷特睨。夷然引退，戒此羸壯。先宮允戀，直忤時，絕歡要路，竟以孤立被擠。故事，註誤諸臣，格皆外轉，而神廟特原忠悃，默燭讒奸，別授同曹以示優異，嘉隆以來所未有也。

達生無我，高誼薄雲。冥情顯晦，泉石娛真。玄風獨邁，逸藻繽紛。芟厥繁穢，功在斯文。嗟我小子，匿瑕叢類。負荷不堪，瀕於廢墜。遑遑昕夕，爾勛爾勵。緬維慎修，敢云保世。

呈司徒季父五章 有序

季父抱德範俗，仗節立朝。禧朝初微拜容台，尋擢大廷尉，表陳三劄，入侍經筵。俄而總計留都，方將大行其道，疾邪若汙，守志不渝，釐蠹剔奸，逆璫側目。陰霾煬竈，君子道消，容裔初衣，朋從日廣。闡微言於洙泗，振高躅於河汾，寤寐顒印，徒深仰止云爾。

廓哉二儀，至道克塞。孰是仔肩，元夫有則。被仁弘義，淵毅方直。四國景行，其儀不忒。精一之旨，往哲肇宣。匯流洙泗，實潛其源。繫余季父，獨刊陳筌。居然堂奧，德業攸尊。植德既豐，秉節維純。絕彼奸回，濟此國屯。乃丁陽九，越在隱淪。志存身晦，卓爾天民。丘園適賁，性學闡敷。朋來豫樂，斯人爲徒。周旋聲咳，允著嘉謨。冥於化運，曷問榮枯。滔滔末世，情欲是縻。塾乎昏昏，惟父振之。履道坦坦，慎言惇惇。挾微修慝，玄襟匪夷。

豐草六章 並序

豐草，賦閒居也。余少不堪食貧，竊慕昔賢抱關之義。丙寅春將捧檄矣，俄以宿尤，幾爲權奸所陷，遂飄然引避，縱情林水，以遂有生。尋構數椽，差避風雨。治畦之暇，委懷琴書，菽水蔬羹，優遊子舍，言笑宴宴，洽我友朋，茲亦天倫之至樂，不難與世而相遺也。因感考槃丘壑之風，逃虛守拙，傲然自足，欣暢

彌襟。

萋萋豐草，漠漠長林。裴回昕夕，實慰我心。往哲是模，豈繫自今。顧瞻飛鳥，爰寫鳴琴。
豐草萋萋，長林漠漠。裴回昕夕，我心既獲。火耨刀耕，資用匪薄。時乎不遇，考槃斯托。
炎疾既消，景物斯和。招從鄰曲，幽事實多。晤言詵詵，遂及笑歌。今我不樂，來日如何。
得失之際，宣尼有言。苟能衡命，不諱執鞭。庸知所好，淡薄自崙。優哉悠哉，聊以永年。
孰是保軀，而非明哲。漱彼清泠，蔭此嘉樾。心遙晷駛，言念綦切。巧者勞勞，我任其拙。
舍生徇物，豈情所宜。一丘一壑，自謂過之。饑則待炊，閒當命厄。寤寐無忤，庶其免而。

涉江五章

江之廣兮，有菱有荷。言往從之，爰撫其華。輕颺揚翔，安瀾欲狂。
江之廣兮，有菱有荷。言往從之，爰撫其華。輕颺揚翔，安瀾欲狂。
江之廣兮，有荷有菱。言往從之，爰撫其英。輕颺裴回，安瀾欲隕。

白石晃晃，江水淩淩。雖曰淩淩，中心如蕩。惓然興思，夫誰與我榜。
白石摺摺，江水淩淩。雖曰淩淩，中心如獵。惓然興思，夫誰與我楫。
白石隊隊，江水匯匯。雖曰匯匯，中心如醉。惓然興思，夫誰與我濟。

房中樂

簾櫳薄暮東風暖，釵鳳半敲雲鬢偃。臙脂殘粉瀉溫湯，臥鴨熏爐香不斷。螭文雕鎖閉青閨，銀燭生煙喚酒遲。停歌婉拍爲君壽，月滿疏櫺醉不知。芙蓉帳底春光驀，流蘇乍解湘裙約。千金莫惜買良宵，妒殺銅壺催曉月。

前有一尊酒行

遊絲婀娜縈春煙，落花啼鳩催少年。白駒過隙不肯駐，玉顏臨鏡愁相煎。眼中醪醕清如泉，紅妝娥娥嬌且妍。新聲合節和素弦，停腔斂盼爲君憐。爲君憐，奉君壽，物態如秋雲，前有一尊酒。五侯三事曾幾何，願得良時對佳友。

思妾行

玉爐殘篆凝雕窗，紫燕朝銜落蕊香。深院綺衣閒寂寂，蕙風簾捲晝初長。晝長君不見，花影雲千片。苔蝸上空階，粉蝶嬉團扇。團扇輕揮錦瑟塵，征鞍何處盼離人。香消琥珀寒孤枕，月暗薜蘿無恨。

遠津。遠津芳草年年綠，思妾紅顏那可復。海棠花下屬清歌，離聲莫作瀟湘曲。

昌華廢苑行

君不見劉家兄弟擅豪雄，穗城佳麗侔維中。離宮遠映三珠樹，別館還依八桂叢。邊釁坐銷閒介冑，更辟昌華開苑囿。墨翰全收上國英，衣冠盡挹中原秀。南面稱孤樂事多，椒庭歌舞盛紉羅。就中掇得春如海，楚媛吳娃愁幾何。自謂繁華無與比，江天水戲尤堪侈。龍舟夜月泛晴沙，蘭槳春風吹白芷。千秋疑冢帶寒煙，陵樹蕭條古水邊。獨有芳菲情不耐，教人空豔素聲田。

閨怨

飛光沖煙露花濕，芳叢委豔低如泣。閑房竊馱闕嬌春，驀地香風愁得入。縑絲百箔經時斷，縠幔長垂晝不捲。鏡臺釵匣生塵埃，二十四番吹未半。靡蕪遮地柳著黃，津頭沙暖夢鴛鴦。可堪更問關山月，越水秦城雙斷腸。

北郊行

直於弦，空如擣，三城迤北呼鸞道。酒旗風裏送征鞍，十里寒煙沒衰草。馬鬣荒碑閱歲年，青霜剝落松杉老。舊冢累累新冢逼，牛羊閒行眠不得。肖形翁仲默爲情，山鳥山花怨何極。莫詫任囂土一丘，紫雲天遠夕陽收。謁來井邑多橫死，暴骨何曾到家頭。

詠懷

勝情覺無幾，繫累恒苦多。青陽宛如昨，朱夏忽蹉跎。商飆流戶庭，繁露沾林柯。哀猿嘯中野，寒鳥鳴相和。感茲日月除，悵彼勞者歌。膚顏謝疇昔，不樂將奈何。

飲酒

解憂惟杜康，斯語良匪激。況乃索居際，短歌禦岑寂。相對盡一升，頽然堪岸幘。但取快心志，何必斗與石。至理人莫窺，柴桑卓高識。

赴都別伯兄啓圖

嚴冬戒原野，羣動咸休棲。胡我事行邁，而乃輕別離。別離詎云苦，所虞曠庭闈。林護有餘芳，明發殷中懷。分情變寒律，填簾聲淒淒。繫戀不忍前，涕泗沾人衣。出戶三太息，仰見浮雲馳。

遊仙

神山發石髓，藍田產靈玉。攬策事長遊，誰能終碌碌。高蹈尋丹書，彷彿窮地軸。西循涉濛汜，東戾晞暘谷。揮手弄雲煙，寰區一何局。逸覽恒超然，規觀祇輦蹙。

南園社中贈陳集生太史

離明勝文物，彪矣爲國章。夫君中蔚起，束髮膺袞裳。聲華遍寰海，麗藻標堂皇。被命事輶軒，翱

翔還舊邦。敦茲風雅誼，千秋從擣揚。延結迨閭泯，載筆依輝光。

送蔣夢範之延綏

洪流遍寰海，岱嶽猶崢嶸。世人皆啜醢，而君乃獨醒。踟躕困京邑，抱道安所榮。文心極淹博，茹奇吐玄精。締好相喻問，楮墨多儀型。何當攬衣去，別慮恒怔怔。

述感

束髮尚夸邁，通顯非所謀。秉衷霄漢間，落落難爲儔。侵尋迨中歲，百慮紛相投。生事日以虧，窘逼內自尤。露肘方捉襟，狐死寧首丘。垂老爲貧役，衝寒走道周。骨肉任睽離，鄉國阻且修。抱牘慚匪躬，洩勃幸見收。顧此猥屠資，驅策將安求。守拙亦云美，素業空千秋。

初秋郊寺避暑

野剝隱平臯，巍樓闕層城。靈境謝氛埃，秋空散炎蒸。綠槐森蕭蕭，殘蟬時一鳴。鏡理有餘賞，玩物聊移情。暢矣箕穎儔，天氣飄素纓。

曉月

露薄東方高，衆星忽已落。獨此雲娥鑒，隕然挂天角。碧空淡於洗，浮光亂參錯。老兔不知寒，輕

風裂霞幕。

送家兄啓圖補官

髦士騁熙績，蹇運亟材譖。值茲戎馬秋，蹂躪將焉如。王事信靡盬，肉食方拮据。伯也肆宏襟，攬轡遵上都。牛刀詎輕割，龍盾聊復圖。抗迹珪組間，翼贊諒非孤。懋爾安攘略，千載垂令謨。管樂有殊軌，奮志終齊驅。拙哉余小子，操術一何迂。聲譽靡所藉，株守園若廬。臨路增慨慷，霜樹驚寒烏。升沈各有致，行矣毋趑趄。

春晚

夜爽客不寐，春陰蟪先鳴。稍遲東樊月，延照西澗汀。高詠展遐趣，薄懷忘近營。安得箕山儔，一笑披柴荆。

示禧裡二兒勵學

學問正何取，奧義涵其中。微言迪英哲，典論開顓蒙。苟非先聖訓，醞釀於心胸。雖復美衣食，將與鹿豕同。君子務進修，曲士徇窮通。識力貴超邁，器宇羞凡庸。盛年不我再，鬢髮如霜蓬。勉矣恒咨求，諒無旦夕功。

寄友人白雲山居

白雲山下多瑤草，白雲山中開土老。古榻空餘瘞鶴銘，新詩偶寄呼鸞道。近聞結屋清溪陰，煙莎不剪莓苔深。有時長嘯倚巖石，木葉蕭蕭風滿林。短衣荷簣無人識，日採松花充午食。藜杖歸來及晚鐘，前峯月照溪煙碧。

采茶女郎行

小姑青絲初覆肩，阿姊勒帛橫胸前。禿襟細苧薄如霧，芳春調笑茶畦邊。畦樹陰疏風日暖，江天雨過黃芽短。纖手盈盈折露梢，傾筐只覺含情遠。溪橋草色綠參差，贏得行人問路歧。嬌嗔不語潮紅暈，無限春愁兩頰知。

采石

萬斛蒼茫水，一片青葱壁。江流石終老，玄情在遐邈。何年樓閣輕煙擘，云是開元釣鼇客。管取文章傲世人，蛻向晴川見風格。渚月汀鷗醉未醒，扁舟憑弔不勝情。回波若寫嶽崎色，渡口空聞蘆荻聲。

捕魚圖

滄江石出煙水清，林麓雨過溪山明。眾船老叟快呼侶，隔浦輕篙魚不驚。兒童軋軋能蕩槳，鼓柁揚

艸催下網。力柔沙軟探網遲，叫囂已作魴鱖想。綠楊沈影藕花稀，菰渚潮生落照微。船頭濺水牢籠滿，少婦收鷗薄暮歸。攜魚換米羹盈甌，維梢直向前村澚。酒旗風裏唱蠻歌，波底月高酣欲舞。

朱隱君漱流石

東水生煙滿中宿，軒轅吹斷崑崙竹。猿歸峽裏不聞聲，一片雲根壓飛瀑。中有幽人恣遐躅，坐破蒼苔弄澄綠。掀雲浣翠苦不足，夢入層巒瀉金粟。乖龍扶山巨靈肅，生憂壞此混沌玉。貯得清冷千萬斛，畀爾來昆暢心曲。我生見石不輕愛，今來已作南宮拜。非關磊砢標天奇，遠意卻在嶙峋外。

春江花月夜

平臯淡初白，晚渚凝幽香。棲鳧夢芳芷，泛客回沙棠。虛光淨綠一千里，遠水生煙奪蠶市。休將短字瀨長綸，潛魚不餌緘情紙。誰家思妾倚高樓，橫笛一聲天際頭。江蘼泣露老龍語，何似瀟湘錦瑟愁。

重九北山登高

九月九日山風飄，冷煙吹過流花橋。城路萼芳到村市，酒帘十里青搖搖。高丘遠壑堪流矚，驟裏連韉車擊轂。不知何事速來鴻，但見秋霜變林木。殘暉半嶺巖影斜，樵歌牧吹爭謹嘩。且須拚醉山人家，何如滿把東籬花。

木綿花樹歌

樓臺影裏光如驀，氤氳海氣籠山郭。踏青已過春未闌，別有芳菲趁行樂。昨朝禁火家無煙，炊向枝頭烘欲然。扶疏槐柳千叢錦，最愛江南穀雨天。喧風飄斷官亭雨，杜宇啼紅不知處。好是東皇駐六師，朱旗絳節雲中舉。

春望篇

玉壺香冷吳歌寂，花落花開空太息。裴回孤影暗傷離，登高溯遠情無極。春城海色何氤氳，城南官樹高連雲。誰家錦杼當窗織，是處銀箏隔水聞。銀箏錦杼喧城郭，寶勒文軒互參錯。蝶眉慵對遠山低，鴈字愁從春浦落。朱欄遠近東風早，柳坼桃蹊藉香草。漠漠炊煙帶酒旗，遊絲未斷啼鶯老。白紵青衫幾度新，眼中無數可憐春。臨風莫更塞芳杜，留倚紅妝喚酒人。

老馬行

城陰老馬羸且孱，霜蹄磊落毛斑斑。大宛異種人不識，年深駿骨空凋殘。蘭筋隱隱骨法露，有客過之徐一顧。借問來從渥水窪，進登天廐供常御。躡影曾教冀野空，驕嘶賺得奚官妒。向來朔北多邊烽，天子遣賜邊臣功。臨關百隊皆屏息，落葉一片行追風。清曉牧閒歸甲帳，高秋氣欲犁氈穹。幾年羽檄東西絕，分與將軍同汗血。寶勒翻摧瀚海波，金羈遲控燕山月。詎知天意右狂氛，北軍南走

爭殺人。蹉跎歲月風沙滿，至今伏櫪徒酸辛。更愁力盡傷羈勒，芻秣不時還踟躕。當街羞見轅下駒，萬里超騰方此夕。卻笑世間輕薄兒，紛驅郊陌競黃驪。誰能物色興枯槁，不及悲鳴君早知。

暮秋李花

虛窗綠影紅塵杳，昨夜微霜驚宿鳥。玉衡天遠不禁秋，疏姿映帶林塘小。厭隨繁蕊簇暄風，臙裏籬香撲酒空。輕薄葦綃寒獨浣，綈衣無地擾師雄。

白馬篇十六韻

驤裏千金裝，銀鞍七寶光。臂鞚橫翠羽，腰劍淬魚腸。蹀躞趨平樂，傳呼入未央。女兒專內閭，家弟拜中郎。塞北驚烽火，關西迫犬羊。奮身膺虎旅，銜命捷龍驤。毅勇鋒先奪，英雄殿每當。三秋收隴阪，百戰定河湟。懋賞彤弧出，殊恩紫誥香。繁纓歸邸第，芻秣厭膏粱。牧豎爭垂組，奚官盡佩璫。風流傾霍衛，意氣薄金張。聲栗吹秦女，琵琶擁趙倡。桂釵徵妙舞，桃管狎清觴。解甲聽宮漏，投鞭近苑牆。寧知人代裏，憔悴有馮唐。

謝陳宗伯叙刻先集十二韻

蹇運資元弼，洪裁展碩卿。漸儀雲路矯，繩武玉班榮。駿譽馳天策，龍光賁史箴。秩宗華選舊，端揆壯猷賡。士類懸耆蔡，人倫擅漢京。典型歸大雅，鞭弭狎齊盟。白社昭陽煥，青藜太乙呈。考祥

推獨步，高詠愧同聲。世業徵遺簡，家修借秉衡。櫛揚斯溢美，文誼恰雙清。墨苑風流地，蘭襟月旦評。願言將不朽，珍重慰柴荆。

集憑虛閣十二韻 並序

閣敞雞山之陽，背台城而面青溪，巖翠江光，居然勝概。甲子初秋，與諸彥談藝閣中，佔畢餘閑，因援毫而書於壁。

高閣倚蒼穹，煙霄四望同。地連宣聖宅，山接梵王宮。野色囂塵外，江光眇靄中。午涼生几席，晴旭護窗櫳。麗澤宜嘉侶，清裁識化工。蕙香凝縞帶，松液沁郛筒。思越崑崙表，情飛渤海東。素琴歸雅奏，華髮任飄蓬。鍾阜形如蓋，台城勢似弓。鴈行分浦落，蟲語入秋空。鼎鼎通衢陌，森森際谷叢。泠然無不可，颯忽御長風。

澠川七夕十韻

溪色蕩林丘，斜曛散壠頭。澤梁清露浣，籬落暝煙浮。遠睽窮霄漢，閑情付女牛。綵巾微送暑，團扇易驚秋。鵲影聯橋靜，螢光繞壁流。薄霞低拂幔，纖月半垂鉤。桂性宜村塢，蘭言泊海陬。芋瓜沿俗課，童稚趁宵遊。河鼓年年事，江帆際際憂。莫令孤雅韻，疲夢愜滄洲。

東關蓬石少宰十六韻

自顧卑棲色，慵迂匪一端。雞壇增潦倒，榆社曠盤桓。頃牀狂氛擾，方憂聖澤闌。受降陸遠略，朝漢失雄觀。朔馬嘶雲勁，霜烏擇木難。山公能啓事，海客惜投竿。鼙鼓驚貂珥，烽煙老鷓冠。入林青靄隔，沈玉素書寒。火德彰星紀，祥輝著井幹。天南周警衛，日旰費傳餐。簡陋恩初渥，持傾道弗刊。彙徵羣品具，疏遜有徒繁。左廣韞橐戢，窮東杼軸殫。末流傷淝刺，中谷奏漪蘭。白水徵文叔，蒼生憶謝安。爲霖須旦暮，翔洽九區看。

詠鴈八韻

萬里隨陽翮，生涯匪一鄉。掠雲過玉塞，乘月到金塘。避弋呼羣舉，驚羅顧影忙。周旋資葦荻，迢遞閱風霜。陣演看奇字，聲迺接斷行。羽儀天路迴，粒食旅懷臧。矯矯庸無情，勞勞慎自強。白書如可致，蹤迹老炎方。

溪上望樵山八韻

葛洪偕隱意，宗炳臥遊心。少室原相許，匡廬未可尋。一灣看雪濶，十里見雲林。水際峯巒影，天邊猿鶴音。谷香邀短策，巖翠落幽襟。欲踵誅茅事，還虛振壑吟。石塘陰不展，圭竇日初沈。宜待秋風晚，中阿採鬱金。

晚登南蓬諸峯環眺溫川田廬十韻

短筇滋逸興，煙際俯平瀍。落木迴秋色，空山宜夕陽。谷偏紆澗路，林隙次坳堂。壟刈雲千畝，郊畋水一方。市喧需耨藥，村務括農桑。比壤勞安集，頻年乏蓋藏。壑蘭深匿影，籬菊淡輸香。有侶懷笙鶴，何人問石羊。鉤竿歸宿晚，樵笛引歌長。寥廓疏蹤迸，涼颺振大荒。

關山月

漢月生銀海，高秋幾度圓。清笳吹不墮，一半入明天。遠客牽歸思，征衣徒自憐。玉關回首夜，臨望轉淒然。

白雲道中

言期鶴林侶，偶值鹿門翁。遠鶴紛啼鞠，前溪半飲虹。雲歸暮鐘斷，木落秋山空。短策都忘倦，柴荆鮑井東。

田家早秋

茅屋幾家村，村酤老瓦盆。浹旬收黍稻，隨地散雞豚。澗響先通牖，山光半到門。西風一夜發，作意護蘭蓀。

晚泊甘竹灘

蒲帆收夕照，石瀨壅寒漚。野戍黃花早，江天白露秋。
笛聲喧水市，鴻影帶山樓。拓落憐漁父，垂綸詠未休。

流霞島

倒影辨嵒堯，秋光薄葦蕭。聞鐘知近寺，沿水欲通橋。
逸想披雲笈，閒盟屬野樵。蓬壺疑在望，叢桂不須招。

初夏漫興

未盡憐芳意，春深卻黯然。露酣書帶草，風掠酒旗煙。
蝶粉勾香濕，蟲絲報客牽。倦遊傷短鬢，多病負韶年。

秋杪集南園

風格勵吾曹，高騫聽海濤。晚帆□斗笠，秋色澹亭臯。
地以名流重，觴從韻事豪。入秋興仰止，蓬鬢欲蕭騷。

東洲寺避暑

芳杜滿溪塘，花宮水一方。濕香消茗盃，危石護繩床。
鳥慧閒生媚，雲慈夏亦涼。坐依苔徑曲，林